

左恪靖侯奏稿續編

恪靖奏稿續編卷六十二目錄

出關諸軍進至古城留防要隘摺

覆陳杜賊紛竄摺

辦理糧運情形片

官軍攻拔古牧地堅巢克復烏魯木齊迪化州大概情形摺

遵查吉爾洪額揭參金順各款失實摺

遵查吉爾洪額片

威儀軍應行汰併摺

出關諸軍進至古城留防要隘摺

奏爲出關諸軍次第進至古城留駐巴里坤並籌防哈密安玉要隘以遏奔竄而赴戎機恭摺仰祈

聖鑒事竊臣於四月十三日馳報資遣馬步各軍分起出關後疊據總理行營事務三品卿銜布政使銜法福陵阿巴圖魯西甯道劉錦棠稟報分統右軍記名提督新授漢中鎮總兵譚上連甫抵巴里坤謀報馬賊由布倫托海出紅柳峽僻逕繞過古城聞將折竄歸巢譚上連率所部急進比詎知賊騎二百餘已由南山竄向吐

魯番西去譚上連率所部扼紫茂茂臺色畢口大石頭
三箇泉等處以護運道自率兩營進駐古城劉錦棠飭
繼進馬步各軍均就哈密取存糧分起短運踰天山以
抵巴里坤由巴里坤短運抵古城限閏五月底一併取
齊候令進止自率輕騎赴濟木薩金順行營商定方略
並赴前途察度地勢以便布置屯糧護運轉輾轉輓事
宜詢知土回馬明等結壘之處爲古牧地迤西而南數
十里爲烏魯木齊紅廟子官軍必先攻古牧地撤烏垣
紅廟之藩籬乃可成搗穴犁巢之舉也濟木薩卽愷安

城距古城九十里由此而西七十里爲三臺驛又西八
十里爲滋泥泉又西九十里爲阜康縣城又七十里爲
黑溝驛又數十里至古牧地再進即可抵馬魯木齊矣
濟木薩距城尙遠不能扼賊之吭劉錦棠會師進剿必
先據要地爲儲糧屯師之所然後左右伸縮可以有爲
阜康雖祇空城而地當賊衝從前馬賊之犯科布多聞
卽由阜康駛出劉錦棠之注意於此一爲進攻古牧地
一爲遏賊奔竄實非無見惟阜康駐軍僅能遮截逆賊
出竄一路其西北瑪納斯出竄之路尤宜先事綢繆臣

密飭劉錦棠於未進阜康之先與金順圖之現接劉錦棠稟開五月初十日由巴里坤率所部數營進古城先赴濟木薩與金順會商一切卽馳赴三臺滋泥泉阜康一帶相度布置計旬日內外所部各軍可齊抵古城當調其分起銜接而進約立秋之前乃有戰事也劉錦棠所部分紮木壘河迤東護運各營擬調赴古城遺防各壘亟宜填紮臣已調記名提督徐占彪率所部五營前往徐占彪自請解歸劉錦棠就近調遣臣已允之計此時已抵巴里坤接替延紮其木壘河迤西一百三十餘

里司邊古城諸處則已咨商金順飭原防各營分段縮紮當可無虞其哈密布置原有廣東提督張曜所部十二營及宋慶留哈勇丁八百名前以安西州有通巴古路徑張曜分營設防安西茲大軍前進巴古之間有徐古彪一軍填紮以時局言宜厚哈密通吐魯番大路之防而巴古通安玉之小路若在所緩而臣之駐肅僅親兵一營馬隊二百騎亦無可再撥者劉典與臣書慮肅軍之單不資分布而腹地漢回安謐分防各營尙有以應調者飭總兵徐萬福率所部兩營兩旗赴肅臣念

督標兵丁久經訓練亦欲調其入營學戰以成其才除
調隨營馬步弁兵三百員名赴肅此月內外均可取齊
擬俟到肅復酌增安玉防營俾張曜所部悉赴哈密以
絕旁竄而備將來軍鋒之選此籌策布置大略也察看
關內外征防諸軍和戢一心氣勢完固前敵軍糧長運
短運均尙應手儲峙亦裕尙堪仰慰

宸懷謹據實馳陳伏乞

皇太后

皇上聖鑒訓示謹

奏光緒二年六月初三日

張陳杜賊紛竄摺

奏爲遵

旨覆陳見籌杜賊紛竄情形仰祈

聖鑒事竊臣前奉

諭旨據額勒和布托倫布先後奏報逆匪竄擾沙扎蓋等處見在大軍出關該逆鋌而走險窺伺北路自在意中烏科等城境內未有重兵空虛可慮倘被其竄擾則勢成燎原聚殲不易著該大臣等揀派勁旅於北路地

方擇要扼紮以杜紛竄欽此閏五月十一日欽奉

寄諭金順奏追剿北路竄匪情形並請飭烏科等城派兵扼紮要隘英廉奏回匪竄擾塔境派隊防剿暨俄人解運軍糧被匪搶擄各摺片覽奏均悉賊匪由布倫托海鼠出紅柳峽地方經官軍跟蹤追剿賊由吐魯番仍回烏魯木齊金順見派兵駐紮木壘河三箇泉等處梭巡防剿但北路沙磧遼闊無險可扼防不勝防且東路爲大軍後路糧運所必經該逆雖已歸巢難保不乘間窺伺金順仍當嚴飭派出各軍認真防探遇賊卽擊毋

稍疏懈而倫托海進西昂齊山地方竟有賊匪搶刦俄人糧石之事該處地勢以烏魯木湖烏梁海沙札蓋爲扼要之區金順擬將塔爾巴哈臺索倫等隊扼紮烏魯木湖科布多蒙古等隊扼紮布倫托海或烏梁海適中之地烏里雅蘇臺黑龍江等隊扼紮沙札蓋藉堵賊匪紛竄著榮全額勒和布車林多爾濟杜嘎爾托倫布保英英廉酌度情形倘能分撥官兵前往扼紮未始非先事預防之計惟各城兵勇無多防剿均屬喫緊恐一時不敷分撥兼顧爲難前月左宗棠奏資遣馬步出關當

因烏科等城兵力甚單恐逆匪被勦旁竄諭令該大臣等揀派勁旅於北路地方擇要扼紮見在烏魯木湖等處既爲賊匪必竄之路卽著左宗棠金順妥爲籌商若各城無可分撥之兵該大臣仍當懷遵前旨卽派勁兵前往駐紮以杜分竄等因欽此臣維制賊之要在審賊勢察賊情而合地形之遠近衝僻以通籌乃可策全功而免意外之變臣於關外西北地形未能懸揣不敢冒昧指陳上瀆

天聽惟前奉

諭旨揀派勁旅於北路地方擇要扼紮比已恭錄行知
金順劉錦棠熟察地形妥爲布置務期周密仰慰

宸廑一面咨委烏魯木齊領隊大臣錫綸赴沙山一帶
預籌截剿飭總兵桂錫祺都司馮以和所部併歸統帶
茲金順派撥吉林黑龍江馬隊合成千騎歸錫綸統帶
以資得力並飭劉錦棠挑派將領率步隊佐之見准金
順咨稱調徐學功馬隊三營步隊一營歸錫綸調遣劉
錦棠進阜康大隊取齊又適奉行知閏五月十一日欽
奉

諭旨自必恪遵派撥是錫綸兵力不虞單薄也錫綸生
長邊疆熟悉蒙部情形能通蒙文蒙語聞其爲人亦其
倜儻與金順榮全均稱相得近時俄糧續由沙山一帶
運送一百餘萬斤卽係錫綸迎護茲令訪剿竄匪更有
攸宜竊維用兵宜布遠勢金順所陳將塔爾巴哈臺
索倫等隊扼烏魯木湖蒙古科布多等隊扼布倫托海
或烏梁海適中之地烏里鴉蘇臺黑龍江等隊扼沙札
蓋原因賊騎颺忽特甚北路平沙廣漠防不勝防慮難
一處聚旆故爲此節節邀截之計雖於烏利兵力單薄

調隊維艱情形未遑計及而就事論事實有不容已者
臣以賊情賊勢度之陝甘逆回被白彥虎迫脅出關者
非盡屬其死黨不過因頻年未經重創相與安之白逆
等復劫其各寨營屬北竄遐荒似非陝甘各回所願至
關外土回自戡定後馴服有年已成積弱之勢狡悍肆
亂者無多白逆縱糾其北竄亦必無應之者如大軍進
逼環攻諡以勦撫兼施之意釋脅從而急渠魁解散必
眾逆賊如從阜康境內竄出金順劉錦棠所部截之自
有餘力如從瑪納斯竄出近則孔才各營稍遠則錫綸

新統各營截之亦可不令其善脫而塔爾巴哈臺後路
又阻其前英廉所部雖單榮全應挑撥動旅歸其調遣
或扼之烏魯木湖或就近擇要截擊皆可確操勝算惟
備禦不虞古之善教烏科兩城舊爲邊城要地自古用
兵西北從北路出兵無由南路者兵事未可久荒當此
殘逆喘息僅存而使百密一疏亦非全策如慮兩城兵
力單薄糧運維艱則

諭調精兵於科城烏城前路擇要扼防或卽由兩城領
兵大員就近添調防兵嚴扼奔衝以資周防而固封守

給以薪水口分俾其盡意布置務保無虞計北路兵事
當可剋期告蒞需增防兵爲數非多所耗無幾而大局
益臻穩慎矣伏懇

申諭榮全英廉額勒和布車林多爾濟杜嘎爾托倫布
保英實力籌維共襄茲舉毋因惜小費而忽遠猷則誠
時局之幸謹據實覆陳伏乞

皇太后

皇上聖鑒訓示施行謹

奏光緒二年六月初三日

軍機大臣 字寄光緒二年六月十七日奉

上諭左宗棠奏布置出關各軍並覆陳杜賊紛竄情形
金順奏特參副都統吉爾洪額不遵節制各摺覽奏均
悉劉錦棠所部見擬進紮阜康爲進攻古牧地之計其
瑪納斯一帶爲賊匪出竄之路尤宜先事豫防左宗棠
已飭令該員前赴濟木薩與金順會商妥辦此外其臺
古城及哈密等處亦經分派隊伍扼要進紮並委錫
綸帶隊赴沙山一帶截剿布置尙屬周密劉錦棠率所
部此時已行抵古城左宗棠金順妥速會商飭令各軍

相機進取次第收復各城以期早日蕆事惟大軍進剿該匪竄而走險勢必四路分竄塔爾巴哈臺烏里雅蘇臺科布多等城兵力雖屬單薄亦應聯給聲勢妥籌防剿著榮全額勒和布車林多爾濟杜嘎爾托倫布保英桂祥英廉各就見有兵力扼紮要隘遇有賊蹤竄近卽行實力兜剿毋稍疏虞副都統吉爾洪額因病請假該員所帶之隊經金順派令沙克都林北布前往接統乃吉爾洪額抗不交代輒將沙克都林紮布禁錮室中並有令眾兵向沙克都林紮布索取欠餉等情似此任性

妄爲不遵軍律實堪痛恨著左宗棠按照金順原奏各節認真查辦據實具奏其所統官兵卽著金順飭令迅速交出不准藉詞宕延一面先將該副都統看管聽候查辦金順原摺著鈔給左宗棠閱看將此由六百里各諭令知之欽此

辦理糧運情形片

再北路採運總局設於歸化分局設於包頭經臣奏委升用知府陝西卽補同知前署綏德州知州陳瑞芝提督銜總兵蕭兆元試辦一年有餘已據稟報採辦五百

餘萬斤合之甯夏採運幾及七百餘萬斤陸續解巴里
坤存儲近時大軍次第出關及金順借糧急濟均指此
應之其甘州高臺肅州安西哈密採運存儲之糧積至
二千數百萬斤不爲不多惟此路經過戈壁天山艱阻
異常馱駝車輛向視爲畏途兵燹之餘人畜彫殘勉籌
轉饋勞費萬狀而究於軍儲少所裨益故自來西北用
兵無用關內之兵轉關內之糧者蓋地勢物力實足限
之臣於上年試辦歸化包頭轉運意欲於北路別開新
徑以裕軍儲實緣迫不得已事之克濟與否未可預知

幸奉

諭旨准其照辦而委員陳瑞芝蕭兆元等不憚勞苦竭力經營獲此鉅數非始廩所及也近因南路糧多運絀而供劉錦棠徐占彪三十餘營糧料外尙須供金順所部分駐巴城數營之糧又需接濟金順全軍軍食不得已飭加雇駝騾車輛轉肅州安西存糧越哈密巴里坤逕抵古城蓋已費不勝計勞無以加矣而中途又時有車壞牲斃之患不能限期畢赴劉錦棠乃儘該軍所有騾駝車輛助運哈密存糧備該軍四五十日之需節節

短運四起四制乃可齊抵古城計閏五月底古局存糧
可得七百餘萬斤尙祇抵歸化包頭甯夏運巴之數耳
而由肅州逕運古城每糧百斤腳價十五兩有奇安西
逕運古城腳價十一兩有奇較之包頭歸化甯夏逕運
巴里坤每百斤祇需腳價銀八兩有奇所費又將過半
由是觀之則用兵西北宜採運西北之糧可斷而知也
轉瞬新穀將登須籌採運臣之愚見必以甯夏包頭爲
大宗惟陳瑞芝蕭兆元等竭力經營雖有成效而於蒙
部情形未能盡悉非加委大員前往督同辦理或不免

利見弊生稍致疏誤查西安協領都統衝副都統喜勝
謹慎明幹熟習蒙部情形前經臣委辦前提督劉松山
軍糧會審成效臣已咨商署西安將軍圖明額委赴歸
化城督同陳瑞芝蕭兆元辦理據圖明額絨稱喜勝已
於閏五月初三口帶同領催格成阿等十員名由西安
馳赴歸化臣並飭陳瑞芝蕭兆元仍照常經理以資助
佐庶北路糧運可期推廣於大局有益謹據實附陳伏
乞

聖鑒謹

奏光緒二年六月初三日

軍機大臣奉

旨知道了欽此

軍機大臣 字寄光緒二年六月十六日奉

上諭金順奏官軍進逼瑪納斯城連獲勝仗並請飭部
籌撥現餉暨請山西各省湊撥專餉烏魯木齊各城應
分新疆月餉請飭嚴催該營糧價等銀請指撥專款各
摺片覽奏均悉總兵孔才等軍進逼瑪納斯城接仗獲
勝官軍見紮該城西北之十里墩憑險築壘設法進攻
金順已飭駐紮沙山子之徐學功一軍就近相機策應
左宗棠亦派錫綸督帶馬隊前往沙灣扼賊北竄布置
尙屬周密劉錦棠所統各隊計可陸續到齊兵力已厚

著左宗棠金順飭令各軍穩慎進取迅將瑪納斯城攻
拔俾壯聲威乘勝規取各城以期次第收復金順餉需
支絀自屬實在情形刻下攻剿正當緊要亟應妥籌接
濟俾資飽騰金順請由部庫四成洋稅項下提撥見銀
五十萬兩迅解來營卽以江海粵海江漢三關欠撥該
都統營餉歸還部款並請由山西陝西山東河南四省
每月各撥地丁銀四萬兩長蘆河東兩鹽務每月各撥
鹽課銀二萬兩湊成二十萬兩之數作爲該都統軍營
專餉按月解清各該省每月應撥別處款餉卽由原撥

金順協餉之江海江漢粵海三關並四川湖北等省分
與轉撥亦係酌量緩急變通辦理著戶部妥爲籌議迅
速具奏該軍協餉各省關積年欠解甚多何以頻催罔
應據奏四川欠解銀一百三十八萬兩山西欠解銀一
百三十四萬兩河南欠解銀四十三萬五千兩山東欠
解銀三十二萬兩湖北欠解銀七萬五千兩江海關欠
解銀三十三萬兩粵海關欠解銀四十五萬兩江漢關
欠解銀四十六萬兩著文格鮑源深李慶翱丁寶楨翁
同爵沈葆楨吳元炳俊啟迅速籌措源源撥解以應急

需勿得再有遲延致滋貽誤出關各軍及新疆各城餉
項前經議令由西征糧臺酌量籌撥左宗棠仍當隨時
妥籌兼顧免致停兵待餉稍涉疏虞新疆月餉每月應
撥巴里坤滿綠兩營六千兩哈密一萬四千兩烏魯木
齊一萬五千兩各省未聞報解該處俸餉等項需用甚
殷應如何分別嚴催之處並著戶部妥爲籌議奏明辦
理金順軍營糧價運腳屯工三項銀兩該都統請由部
指撥切實專款准其作正開銷不與兵餉牽混著戶部
一併妥議具奏將此由五百里諭知左宗棠金順沈葆

楨翁同爵友格吳元炳丁寶楨鮑源深李慶朝並傳諭
俊啟知之欽此

官軍攻拔古牧地堅巢克復烏魯木齊迪化州大

概情形摺

奏爲官軍會同進剿疊獲大捷攻拔古牧地堅巢克復
烏魯木齊迪化州等城大概情形恭摺馳報仰祈

聖鑒事竊出塞諸軍次第進至古城留駐巴里坤並籌
防各要隘情形臣已於六月初三日詳細陳明嗣據總
理行營營務三品卿銜布政使銜西甯道劉錦棠稟報
六月初一日率所部馬步各營進抵濟木薩與金順商
定機宜同時西進沿途各要隘均派營守之初八日金

順進駐阜康縣城劉錦棠進挾城東之九營街調知逆
首白彥虎已由紅廟子移踞古牧地糾合該處回酋併
力迎敵安集延亦遣賊目率黨助戰劉錦棠以賊中正
糧麥豆有糧可因雖後隊尙未到齊然師期不宜再緩
察看阜康大路至黑溝驛七十里縣西一帶深林蔽目
野潦縱橫二十里爲西樹兒頭子尙有廢渠堪引縣西
之水以供汲飲由此五十里抵黑溝驛則盡戈壁無水
泉中間惟甘泉堡一管井開濬僅供百人一日之需不
能安營詢之上人知黑溝驛之上爲黃田水盈溝滄上

流卽古牧地賊已於此築卡樹柵嚴密守護意在斷官軍汲道迫官軍由大道越戈壁五十里而來前阻堅城人馬渴乏可乘其敝也十九日劉錦棠調集馬步各營拔至阜康縣城西十里督飭勇丁開溝引水節節疏通引至二十里之西樹兒頭子就地築壘二十日派馬步各隊排列甘泉堡故掘習井示行大路以懈賊黃田之防騎賊來窺旋卽退去二十一夜三更劉錦棠潛師夜起會金順所部進襲黃田黎明行近黃田卡柵賊始驚覺騎賊紛出遙聞古牧地附近角聲四起劉錦棠與金

順率所部先踞山岡金順飭所部由右路進劉錦棠飭陝西鎮總兵余虎恩總兵陶鼎金率馬隊進左路之左甯夏鎮總兵譚拔萃參將董福祥副將張俊率步隊繼之提督黃萬鵬率旌善馬隊進左路之右漢中鎮總兵譚上連提督蕭元亨戴宏勝譚順典湯秀齋率步隊繼之提督譚和義唐國華率步隊擁護開花大礮知府羅長祐直隸州知州袁奎齡提督張春發副將湯仁和率步隊保護輜重分布已定余虎恩黃萬鵬等先率馬隊分馳下山賊騎向前迎敵官軍奮威猛擊賊且戰且走

旋復合步賊來拒余虎恩等督馬隊張雨霖譚拔萃譚
上連董福祥等率步隊由中路衝出鏖戰數合陣勢悍
賊甚多余虎恩董萬鵬等左右包抄而前賊遂大潰卡
棚踞逆見官軍銳不可當棄輜重狂竄劉錦棠飭馬步
各隊蹣跚緊追且追且殺徑抵古牧地踞逆有縮入城
者有南向紅廟子奔竄者其右路之賊亦經金順擊敗
劉錦棠見古牧地城大而堅未可猝拔收隊還駐黃田
計是役斃賊極多生擒二十一名奪獲旗幟鎗械數十
件戰馬二十八匹劉錦棠所部陣亡弁勇十四員名受

傷弁勇三十八員名此二十二日會師攻拔黃田堅卡
追賊至古牧地獲勝之實在情形也據擒賊供謁黃田
卡柵者陝逆白彥虎之黨謁古牧城之回酋馬明因白
逆安集廷曾疑其與官軍通押回南路喉頭目王治金
中萬率土回堅守其與官軍接仗之黃衣騎賊則安集
廷及南路各纏回也二十三日劉錦棠派營分紮古牧
地城正東及東北二十四日卯刻劉錦棠見有騎賊數
千由紅廟而來一面告知金順准備一面飭余虎恩黃
萬鵬等率馬隊馳赴山前嚴陣以待飭步營爲策應又

調步隊分兩路攻南關分兩路攻山壘一面昇開花大礮安城東南礮臺轟其山壘復移轟城關牆垛多圯劉錦棠卽令譚上連袁廷齡等分途進攻以親兵徑搗山壘之前以馬隊繞出後面斷賊入城之路各將弁勇丁鼓勇齊登遂奪其壘譚上連等見山壘已得士氣愈奮皆冒鎗礮斬關而入立將城關攻破賊奔城中斬擒甚眾劉錦棠卽派各營進據關壘援賊悉力衝撲數次均經馬隊攔截金順並派馬隊兜剿塵戰逾時殪斃黃衣賊酋羣賊氣奪敗潰而南馬軍兩隊合追至卡子溝收

隊是役除金順一軍殺賊不計外劉錦棠所部殺斃
斃悍賊約五六百名生擒安集延逆賊二名南路和闐
阿克蘇纏回各三名葉爾羌纏回四名土回無數奪健
馬三十五匹洋礮舊油鎗旂幟刀子無算陣亡弁勇二
十九員名受傷弁勇一百五十七員名此二十四日官
軍進攻古牧地奪壘奪關並擊敗援賊大獲勝仗之實
在情形也據擒賊供安集延會調集南路各城馬隊派
頭目阿托愛管帶來此助戰官軍馬隊獲黑馬一匹裝
飾珍異卽阿逆坐馬惟阿逆下落尙不可知二十七日

劉錦棠以古牧地關壘既克輯懷城鎖圍已合各營攻具已備飭發開花礮轟倒東北兩面城各一二丈面商金順並飭所部各營分路急攻二十八日寅刻復轟塌城東南牆垛劉錦棠督弁丁三面猛攻城賊拚拒鏖戰兩時劉錦棠所部中軍及董字營突由東南角一擁而入金順所部與劉錦棠所部之派攻東北各營者亦踴躍齊登將城中悍賊五六千人一併斫殺淨盡有逸出者亦經預派各馬隊截殺無一漏網拔出難民婦女幼孩甚眾劉錦棠以古牧地既克守賊盡殲烏垣逆賊必

聞風膽落乘勝直搗一鼓可下遂一面知會金順一面
派隊於二十九日黎明親督向烏垣進發經過卡壘一
律踏平迨抵城東見賊紛竄麾軍分途猛撲斬敵無數
立將烏魯木齊迪化州城池及偽建王城同時克復馬
隊躡賊緊追至鹽池墩一帶始還探報昌吉縣踴逆業
已宵遁其瑪納斯呼圖壁各城已否克復雖未得確耗
然亦斷難穩踞此攻拔古牧地克復烏魯木齊迪化州
城池大概情形也臣維烏魯木齊各城爲新疆關鍵屬
中原多故客回構變土回隨之安集延以亡國之餘乘

機竊踞南路重煩

朝廷西顧之憂蓋有年矣茲由關內籌餉集糧選將出師踰越重險會師進討甫歷四月連下堅城非荷

天恩軫恤征軍

特頒內帑各驅片時艱同值仰體

皇仁推食解衣俾得踴躍前驅迅赴事機之會何以臻此惟餘孽猶存安集延狂寇兇醜雖燔尙未大加懲創是則區區微衷所難自釋者也所有官軍會師進剿攻拔古牧地堅巢克復烏魯木齊迪化州名城池情形先

陳大概仰慰

聖懷其戰狀一切及賊踪聚散分合辦理善後獎卹員弁各事宜俟金順咨報劉錦棠續稟到營再會同金順馳

奏合併聲明伏乞

皇太后

皇上聖鑒訓示施行謹

奏

光緒二年七月十八日

光緒二年八月初三日內閣奉

上諭左宗棠奏官軍會剿賊匪大獲勝仗攻拔堅巢克
復烏魯木齊等城大概情形一摺左宗棠督飭西南道
劉錦棠率各營會同烏魯木齊都統金順所部於本年
六月間由濟本薩西進逆首白彥虎由紅廟子移踞古
牧地糾合該處回酋併力迎敵安集延亦遣頭目率黨
助戰官軍會襲黃田賊卡分途進擊陣斃悍賊甚多踞
賊敗竄官軍緊蹙追殺直抵古牧地各將領鼓勇齊進
遂奪其壘立將南關攻破六月二十七日劉錦棠會商
金順率所部急攻開放大礮轟塌城垛二十八日各軍

踴躍登城將城中悍賊五六千人殲除淨盡二十九口
乘勝進剿烏魯木齊踞逆經過卡壘一律踏平該逆紛
紛竄遁斬馘無數立將烏魯木齊迪化州城池克復剿
辦甚爲得手左宗棠規畫調度洞中機宜金順劉錦棠
剿賊奮勇均堪嘉尚所有一切詳細情形及應行獎卹
名員卽著該大臣等查明具奏仍著督飭各軍實力剿
辦並查明逆首白彥虎等下落毋任漏網以靖邊疆欽
此

遵查吉爾洪額揭參金順各款失實摺

奏為吉爾洪額揭參金順各款均屬失實遵

旨按款查覆以明軍政恭摺仰祈

聖鑒事竊臣前欽奉

上諭吉爾洪額奏揭參統兵大員縱恣各款一摺據稱
都統金順扶同欺罔剋扣軍餉虛設營數畏賊如虎勒
買民糧私受節規庇護匪徒騷擾臺站縱僕招搖私娶
逆婦等語該都統被參各款是否屬實著左宗棠確切
查明據實具奏毋稍徇隱原摺著鈔給閱看欽此臣跪

聯之下正值籌辦出關事宜及進駐肅州料理啟行竊以古城濟木薩行營相距太遠吉爾洪額所劾金順各款非到肅後按款訪查不能得其確實比到肅後訪之衆論參調案卷往復轉折致需時日始得要領破爲我皇上略陳之吉爾洪額劾金順扶同欺罔二摺原奏稱巴里坤領隊沙克都林扎布不欲赴任金順爲其捏病請留查沙克都林扎布並無告病文牘金順前因諭旨垂詢能否回任曾奏請該領隊速以回任是沙克都林扎布既無捏病之說金順亦無爲其請留之事金

順雖旋奏留該領隊在營亦未嘗代其捏病原奏指其
扒同欺罔者謬也原奏稱剋扣軍餉查金順舊部餉事
有無剋扣吉爾洪額無從得知所稱剋扣自係指接統
景廉所部而言景廉所部本有專餉與金順之餉向不
相干當金順接統時糧餉無見銀移交僅以私貨算抵
而又多滯銷之貨人所共知金順無銀散給不能不減
舊部之餉勻濟接統之軍接統之餉既由勻濟而得其
數目不及前以貨算抵之多然金順管餉各員既未經
手支發何所施其剋扣至吉爾洪額所帶吉江馬隊專

餉每月應發銀一萬六千兩按三月一次由戶部撥給
吉爾洪額自領自發金順既不經手從何剋扣原奏指
其剋扣軍餉者謬也原奏稱虛設營數查靖遠振武果
勇親軍馬隊各營合成三十餘營金順接統併爲十九
營先後均有

奏案孰多設孰少設孰實孰虛何可誣也原奏所稱虛
設營數者謬也原奏所稱金順畏賊如虎自指上年滋
泥泉之役而言查占濟以西軍事本未整理金順於所
部外鮮可信心卽所部亦難言稱虛謂其因循未加振

作會多不求精實致進取徒托空言尙或近之至譏其畏賊如虎未免太過且是後吉爾洪額帶隊同行何不整軍以待而獨以此譏切主將乎滋泥泉距濟木薩祇百五十里距阜康九十里距古牧地賊巢則二百餘里謂金順以久歷戎行之人於二百里外偶聞賊信卽恒怯退回似無是理原奏稱畏賊如虎者謬也原奏稱勒買民糧查古城糧價先頗平減後漸昂貴前年夏季每石二兩八錢冬季增至三兩三錢上年春季則已長至四兩由於從前訂價過輕故耕墾者少迨兵勇愈集軍

食愈增而價亦逐漸昂貴民間閉糶居奇有之已領價而不交糧亦有之金順上年春間訂買之糧每石四兩至五兩後又加至六兩然以每石三百四十斤計之則較歸包甯夏採運之糧每百斤需銀八兩有奇核算價值尚減四倍較關內採運每百斤需銀十五兩有奇核算價值更減七倍矣使金順早爲籌畫加糧價以勸耕散牛籽以廣墾則古濟之糧不可勝食何至倍價採買尙難見新攷吉爾洪額翻以勒買民糧爲其罪至勒買民糧一說臣實無所聞金順縱有勒買民糧之事亦因

市價漸增加價採購並非抑價強糶之比原奏所稱勒買民糧者謬也原奏私受節規查烏魯木齊都統向有節規與否無由稽考烏城未復金順見在軍營無任可到似無節規可收軍營弊事不一而足然除糧餉保舉外無從作弊節壽非軍中所有名目金順向無貪聲營員同一窘况誰實取之誰實與之不能指參卽無從查詰原奏所稱私受節規者謬也原奏所稱庇護匪徒係指邢長春一案而言查邢長春係古城商民在免兒橋開集義成磨房並往來濟木薩三臺等處運販貨物上

年十月初十夜吉爾洪額據其營務處謝德清稟稱免
兒橋寄住遊民十數形跡可疑當卽飭統領倪敬修查
拏旋經倪敬修訊明非匪當夜省釋十五日商民邢長
春吳寶亭赴金順處呈控初十夜有官兵百數十人到
磨坊口稱查夜開放洋鎗將商民等一併綁縛所有銀
兩貨物衣服搜搶無存旋經倪敬修帶回釋放懇請究
追金順以邢長春如窩藏匪民則白晝搜查亦無不可
何必夤夜往查又何必開放洋鎗驚動肆市邢長春等
到案倪敬修一訊卽釋旣未究出爲匪實情又未起獲

賊據商民平白受害懇請究追豈可置之不理吉爾洪
額因此懷恨乃以庇護匪徒爲金順罪然還問邢長春
等之爲匪與非匪吉爾洪額亦不能確指也旣不能指
邢長春等爲匪徒自不可誣金順爲庇護原奏所稱庇
護匪徒者謬也原奏騷擾臺站自指傳用官駝而言查
西路軍營向未領餉各差每藉帶辦軍裝爲名販運私
貨由張家口綏遠城兩路行走所運私貨到營以之抵
放月餉軍中傳臺每次需用官駝動以數十百隻計沿
途需索供應勒折羊價久爲臺務巨蠹金順接統各營

以後查無以貨抵餉之事非緊急要差未嘗由臺行走
所需軍裝等項均由山西包頭雇用商駝轉運來營烏
里雅蘇臺綏遠城張家口及各城歷次傳臺案檔可以
行查既未經用官駝自無需索騷擾情事吉爾洪額踵
行舊弊濫用傳單銷售私貨自知迹不可掩乃指商人
韓文秀回京一事藉相抵制見在行查尙未得有實據
原奏所稱騷擾臺站者謬也原奏所稱縱僕招搖指王
鴻義而言私娶逆婦指馬四之妾而言查在軍與在官
不同供使令奔走者非戈什卽親兵間亦用僕從服侍

不過三數人取免私役兵丁之議已耳金順之有僕無僕及僕中有無王鴻義其人臣無從查悉惟原奏王鴻義等恃寵橫行所到之處迎送恐後與各統領營官結盟拜會攬權納賄稍不如意立遭典刑似王鴻義勢焰兇灼非尋常僕從可比各統領營官均與結盟拜會眾口難防必滋物議攬權納賄必有過付之人稍不如意立遭典刑必有被害受屈之人然臣每遇軍中往來員弁留心訪問並無知王鴻義者亦無被屈申訴者原奏自不足憑桂斌聞係西安駐防保至副都統充金順營

務處因被金順劾奏治罪復因看管疏防桂斌旋即跨馬潛逃圖奔榮全軍營中途被賊拉去現聞白逆令其勾致弁丁入夥軍中陸續逃逸者頗多又聞安集延酋怕夏向白逆索桂斌等赴南路均未知確否此事未准金順臧知臣已密飭劉錦棠留心偵察具稟原奏桂斌因觸王鴻義之怒卽行拘囚幾至餓斃亦殊失實至肅州攻克城中老弱婦女悉數由臣派員按賊造戶冊點驗分賞營傍廢壘首逆馬四眷屬其時已分撥提督徐占彪派員看管事定一併解省發落馬四之妻馬馬氏

妾馬張氏親屬劉徐氏姪婦馬劉氏等曾經臬司楊重
雅訊供詳辦旋據詳稱馬氏供係肅回馬倫之妻馬
張氏係漢民包瑞之妻馬劉氏係劉徐氏之女劉徐氏
之夫卽陣亡烏魯木齊守備劉耀武均合供實係良民
婦女被賊搶擄爲妻妾爲姪婦並非該逆等真正親屬
當經批飭有親屬者給親屬領歸無親屬者由官擇配
事先萬目共睹事後案卷可據金順未曾私納逆婦不
待辨而自明不待查而自悉原奏並稱乘車拜客二三
品頂戴官數十員前呼後擁玷辱名器金順是否另娶

有妄實有其事臣無所聞原奏所稱縱僕招搖及私娶逆婦均謬也竊聞吉爾洪額情性乖張景廉亦深知之當去任時忽加委任而以屬之金順金順接統該軍以後吉爾洪額每與齟齬嫌怨日深此次吉爾洪額參奏金順各款非逐一查明固難折服然卽詳加開導冀其降心相從恐台之兩傷終虞決裂見值進兵會剿之際未可依違遷就致誤戎機謹遵

諭旨將原奏各條確切查明據實覆陳伏乞

皇太后

皇上聖鑒訓示施行謹

奏光緒二十一年七月十八日

遵查吉爾洪額片

再前摺繕畢正拜發間欽奉六月十七日

寄諭金順奏特參副都統吉爾洪額不遵節制吉爾洪額因病請假該員所帶之隊經金順派令沙克都林扎布前往接統乃吉爾洪額抗不交代輒將沙克都林扎布禁錮室中並有令眾兵向沙克都林扎布索取欠餉等情似此任性妄爲不遵軍律殊堪痛恨著左宗棠按

照所奏各節認真查辦據實具奏其所統官兵卽著金順飭令迅速交出不准藉詞宕延一面先將該副都統看管聽候查辦金順原摺著鈔給左宗棠閱看欽此臣以吉爾洪額前參金順罪狀已按款查明均屬虛罔此次因病請假復抗不交隊並將接統之沙克都林扎布禁錮並令眾兵向其索領欠餉事前事後均未接准金順緘牘臣無從懸揣茲閱原奏稱吉爾洪額率隊出崇構言惑眾意圖倡亂至斥爲亂臣賊子之倡是吉爾洪額肉莽糊塗罪狀昭著

諭旨交臣認真查辦臣固不難據實直陳惟金順業已
會師前進吉爾洪額尙未奉到革職明文是否迅將所
統官兵交出聽候金順委員看管尙未可知誠慮操之
過蹙復與金順齟齬似於大體非宜遂由驛照會吉爾
洪額宣布

諭旨明示禍福並稱古城至大石頭一帶見商全都統
撥隊分防令其懍遵交隊聽候臣與金順調撥旋奉六
月二十九日

上諭金順奏帶隊大員不遵節制阻撓進隊請旨懲辦

一摺墨爾根城副都統吉爾洪額前因患病請假該員所帶馬隊經金順派員接統抗不交代構言煽惑迫金順派隊迎護軍糧該員復敢縱兵阻撓實屬任性妄爲記名副都統依勒和布驍騎校委參領永成主謀唆鬧幾酸事端吉爾洪額依勒和布永成均著卽行革職交左宗棠查辦以肅軍律欽此同日奉到

上諭著金順卽行派員將該革員等押解進關由左宗棠嚴行查辦按律懲治吉爾洪額所部官兵並著金順飭令接統之員妥爲鈴束毋任滋生事端原摺著鈔給

左宗棠閱看等因欽此吉爾洪額等革職已奉

諭旨所部官兵不至被其脅制料無他虞一俟押解進
關臣當訊明錄供請

旨遵辦謹附片陳明伏乞

聖鑒謹

奏光緒二年七月十八日

軍機大臣 字寄光緒二年八月初三日奉

上諭左宗棠奏官軍剿賊大捷攻拔逆巢克復烏魯木
齊等城大概情形一摺覽奏實深欣慰本日已明降諭

旨宣示並令將出力陣亡各員奏請獎卹矣逆首白彥
虎率黨踞守古牧地見經官兵攻拔堅巢斬殺甚多該
逆與阿托愛兒往何處竄匿仍著查明具奏烏魯木齊
迪化州等城之賊訶知古牧地既克自必聞風先遁此
次雖經克復城池其黨類究竟竄往何處著左宗棠金
順督飭各軍探明賊踪迅速進剿盡殲醜類一面添撥
隊伍會合提督孔才等軍迅將瑪納斯城呼圖壁各城
攻拔毋任久踞見在大軍鼓行而西賊勢窮蹙難保不
乘隙紛竄北路地方空虛可慮左宗棠前調錫輪赴沙

山子一帶豫籌截剿著卽知照該領隊大臣加意防範
遇有賊至卽行邀擊遏其竄逸並著榮全額勒和布車
林多爾濟杜嘎爾托倫布保英桂祥英廉勤加偵探先
事籌防以杜窺伺吐魯番爲南路門戶見在烏魯木齊
旣克卽須規復吐魯番城扼賊咽喉則南路各城不難
次第戡定左宗棠素嫻軍旅自己成竹在胸卽著妥籌
調度迅奏膚功左宗棠另摺奏革員桂斌聞有被賊拉
去令其何致并丁入夥之事著金順嚴密訪拏押解左
宗棠軍營訊明治罪另片奏革員吉爾洪額等俟押解

進關遵旨訊辦等語前據托倫布等奏吉爾洪額等業已帶隊行抵博東齊河地方當經諭令金順派員攜帶糧餉馳赴科境將此起官兵帶回調遣著金順仍遵前旨辦理左宗棠位該革員等押解到營卽行從嚴訊辦將此由六百里冬諭令知之欽此

威儀軍應行汰併摺

奏爲哈密辦事大臣兼帶威儀一軍應行汰併以節虛糜而昭核實恭摺仰祈

聖鑒事竊臣於太年初三日具

奏文麟兼帶馬步遵

旨裁併實數懇

恩飭撥有著專款定限撥解以資整頓一摺奉

旨戶部議奏欽此嗣准戶部鈔咨內開文麟所部減爲馬步各兩營又親兵二百名其餉需經臣議奏照楚軍

章程合之糧價每月共銀二萬兩文麟又稱需銀三萬兩數目迥殊究竟哈密防軍應留幾營其隨營員弁夫役名數需人若干每年需餉若干卽由臣與文麟核實妥定奏明請撥後再由部核明指撥等因當經轉咨查照迄未據咨送花名清冊前來臣亦未便催促旋准明春咨稱文麟因病身故所遺威儀一軍請揀員接帶臣比咨明春會同張曜查點實在人數分別造冊送核茲准咨送點驗花名清冊七本到臣內威儀軍員弁勇役共二千五百六十六員名除點驗未到實只二千三百

一員名按文麟從前所開人數短一千三百四十員名此虛數之宜節者威儀各營除將領營哨各官外隨營員弁多至一百數十員名而哈密沁城屯田每屯有官每棚有長又有文案海查藍旗傳號差官親兵各員弁不知何所用之員弁一人薪水抵勇丁數名口分而有餘餉絀且絕猶可任其坐食虛糜乎此冗雜之宜節者哈密各城屯丁多由外處避賊流徙而來土著最少計奇臺古城濟木薩迪化州鎮西廳漢民居十之九安西所屬漢民居十之一川陝客民僅十九名耳哈密地方

本纒回世業大軍徑抵阜康奇臺古濟一帶難民既思
歸故土而本地纒回之流徙吐魯番者將來復業鵲巢
難任鳩居幸值豐稔自宜預爲籌維屯丁一撤事可兩
利此浮費之宜節者臣前與明春張曜緘商意見相同
惟裁汰冗雜員弁宜酌給川資整理伊始宜酌籌經費
均由臣於軍餉內量爲那墊以期安速俟明春張曜覆
到速將交辦任內一切料理完結一面奏請
飭撥該軍有著的餉定限撥解乃可漸收餉節兵精實
效而明春接統該軍亦可免宿累牽擾矣謹據實陳明

伏乞

皇太后

皇上聖鑒訓示謹

奏光緒二十一年七月十八日

恪靖奏稿續編卷六十三目錄

攻拔古牧地克復烏魯木齊迪化州戰狀摺

李雲麟請 予恩施片

請 飭部查催協餉摺

攻拔古牧地克復烏魯木齊迪化州戰狀摺

奏爲詳陳官軍攻拔古牧地堅巢克復烏魯木齊迪化
州等城戰狀分別請獎以勵軍心並籌布置情形恭摺
仰祈

聖鑒事竊官軍會師進剿攻拔黃田賊棚古牧地堅巢
克復烏魯木齊迪化州各城大概情形臣已於七月十
八日專摺馳陳茲據總理行營營務三品卿銜布政使
銜西甯道法福凌阿巴圖魯劉錦棠續報六月二十四
日攻拔古牧地閘壘並擊敗援賊大捷之後金順劉錦

棠策馬巡視知古牧地城賊守備甚嚴金順遂飭所部
環城正西西北西南三面結壘劉錦棠環城之正北東
北正東東南正南等面結壘抽派營勇於南城外晝夜
修築礮台以高過城身一丈爲度其各面原有礮台均
令培土鋪板以便安礮迨礮台告成布置就緒金順督
所部攻西北一帶並分開花銅礮一尊置湘軍礮台二
十六日劉錦棠飭甯夏鎮總兵譚拔萃率千總莊偉以
開花大礮轟塌東北面城垛復用開花銅礮並劈山礮
緊對缺口連轟之二十七日移開花大礮斜轟城之正

東其巖場缺口與東北相似後以開花小礮及劈山礮環攻不歇城內賊眾踞守益堅二鼓後劉錦棠傳集將領商定策畧飭譚拔萃督同提督席大成副將湯仁和率左軍三營由東北缺口進攻漢中鎮總兵譚上連督同提督蕭元亨戴宏勝率右軍三營由正東缺口進攻均各留隊以遏賊竄知府羅長祐督同副將楊金龍及莊偉率親兵移開花大礮於正南礮台伺天色嚮明指轟南門左側並調集標針快響鎗七響洋鎗劈山礮排列礮台左右同時轟擊提督譚慎典譚和義率中軍左

四旗參將董福祥副將張俊率董字兩營各飭勇丁襲上潛伏牆壕俟大礮轟有缺口卽行攻入直隸州知州袁廷齡提督唐國華湯秀齋率中軍右三旗列隊南城左右以備策應並遏賊出竄之路陝安鎮總兵余虎恩督同總兵陶鼎金率馬隊兩營提督黃萬鵬督同千總崔偉畢大才禹中海守備禹益長馬正國率馬隊五旗提督陶生林率馬隊一營分布正南一帶山岡提督張春發陳廣發率步隊兩營分布西南一帶平川俟城賊出竄截擊布置已定劉錦棠自率老馬隊於城南山壘

憑高督陣二十八日黎明開花大礮轟動南城左側子
牆漸圯大礮測準連轟城身圯卸過半城頭悍賊潛伏
城隈仰施鎗礮官軍標針快響鎗七響鎗劈山礮連發
子注如雨賊多死者城南壘中號鼓齊發南路攻城隊
伍飛奔齊進賊猶以鎗礮憑牆抵放官軍旣上缺口各
以火包向賊紛擲後隊復囊土填壕一擁而入將施放
鎗礮拒賊悉數斬殺城中悍賊分扼巷口死拒譚慎典
譚和義張俊董福祥等各督隊短兵相接斬馘甚眾時
譚拔萃均已入城金順所部又由東北而併進合擊巷

戰之賊所殺殆盡其由缺口逸出者均經預派各馬步
截殺無一漏網陝回頭曰馬十娃爲禹中海素識擒而
斬之其餘所斬賊目則不知誰何也劉錦棠見城賊已
淨始飭所部收隊還營計是役擊斃殺斃焚斃悍賊不
止五六千人生擒二百十五人拔出難民婦女幼孩甚
眾奪獲賊馬二百餘匹鎗礮旗幟刀矛無數劉錦棠所
部陣亡員弁勇丁一百五十八員名受傷四百五十五
員名據擒賊供回酋王智卽王治及金中萬均經官兵
殲斃其安集延派援兩賊目一網塞奇一玉只把什共

帶夷兵三百五十八人已於二十四日盡殲其城內夷兵除生擒外亦均於是日盡矣白逆彥虎本踞紅廟子時往來卡子溝未曾入城故得倖免此二十八日會師攻拔古牧地堅巢首要各逆擒斬淨盡之實在情形也劉錦棠入城察看尚存火藥稍礮數千斤搶回滋文各一通關係王治金中萬等被圍求救於烏城逆首阿奇木者其批回言烏城精壯已悉數遣來現在三城防守乏人南疆之兵不能速至爾等可守則守否則退回烏城併力固守亦可阿奇木係怕夏派甘回馬人得所充

之似官管轄古牧地烏垣紅廟瑪納斯及僞王城回兵
者所稱三城蓋指烏魯木齊迪化州及已死僞清真王
父得璘所築之王城所稱南疆則指安集延而言也劉
錦棠以烏垣空虛當乘勝急攻遂一面知會金順一面
派弁偵探旋據報稱卡子溝兩賊壘已空距卡子溝二
十里之七道灣有賊竄走劉錦棠卽飭譚和義唐國華
兩營留守古牧地城餘隊均於二十九日黎明親督進
烏垣金順亦督所部繼進行近七道灣堡馬隊回報堡
外尚有餘賊見官軍至飛騎而竄馬隊躡追斃賊十餘

名劉錦棠卽留董福祥步隊一營守堡餘隊悉拔前進
行近烏城十里地方探報三城騎賊紛竄遂催馬步急
進甫抵迪化州城北見竄賊千餘已出城里許向南奔
逸劉錦棠立飭余虎恩陶生林陶鼎金率馬隊三營由
左路追擊譚拔萃席大成張春發湯仁和率步隊四營
繼之黃萬鵬崔偉畢大才禹益長馬正國禹中海率馬
隊五旗由右路追擊譚上連蕭元亨戴宏勝陳廣發率
步隊四營繼之譚慎典湯秀齋張俊率步隊三營由北
城衝入劉錦棠率羅長祐袁世齡及老馬隊親兵列隊

城北旋據入城各營飛報城中悍賊百餘人悉經斬殺
生擒賊十三名此外未持械者悉釋勿誅劉錦棠復分
隊入僞王城及烏魯木齊合金順所部將未竄零賊盡
殺無遺據擒賊供二十四日古牧地關壘克復援賊敗
退賊首馬人得與白彥虎等聚議以官軍銳不可當莫
如先遣婦女輜重南竄留精壯駐守再候消息嗣見官
軍大至遂相率逃奔訊畢斬之適追賊馬步各營收隊
入城據稱分追至十餘里地方賊回頭拚扎馬隊合力
猛擊斬殺甚多陶鼎金腮受矛傷襲創與余虎恩黃萬

鵬等急麾馬隊追殺至城南三十里之鹽池墩因踰此而南卽係戈壁未便深追時譚拔萃譚上連率步隊繼至遂與收隊而還是役斃賊約五六百名生擒二十六名劉錦棠所部陣亡員弁勇丁一百三十員名受傷四十七員名奪獲戰馬七十餘匹救出城中難民老幼婦女及避匿山谷者均設法安撫派營務處委員直隸州知州袁世齡經理其事一面商由金順暫委該員代理迪化州篆務以專責成烏城克復劉錦棠連派哨探擒獲零賊僉稱昌吉呼圖壁瑪納斯等城踞逆先後向南

竄逸安集延酋怕夏邇來援賊四五千騎聞已至距烏城一百八十里之大板地方劉錦棠擬派隊迎擊旋訶知援賊已退遂止此二十九日會師連克烏魯木齊迪化州等城追擊竄賊之詳細情形也現在新疆北路一律肅清臣擬商金順錫綸布置各城堡要隘一面商辦善後事宜一面咨調張曜徐占彪會同劉錦棠進規南路并增派馬步各營及鎗隊嚴隊赴前敵助剿一俟布署妥畢再行馳報竊維烏魯木齊各城自同治三年逆回安明卽安得璘肇亂戕部統提督竊踞其中逾二年

自稱爲清真王逆黨馬泰馬仲馬明馬官各署偽號分踞古牧地吐魯番瑪納斯等城又六年妥明喉黨與安集延戰於庫車爲安集延所敗安集延旋赴吐魯番糾妥明之黨馬仲併攻妥明妥明乞降仍令爲清真王踞守烏城別以馬仲爲阿奇木總管各事嗣徐學功帶隊進剿陣斬馬仲其子襲阿奇木偽職與妥明積不相能復糾安集延酋攻妥明妥明旣斃馬明馬官等悉降自是安集延遂於此征收地稅令回漢雍髮易服效其舊俗皆光頂圓領以自別而烏垣各城遂淪爲異域矣安

集延酋怕夏兩次與逆回博開降妥明等盡掠其遺資
搜括漢回民人金帛轉輸南路實其窟穴而驅其丁壯
踞守烏垣各城以爲屏蔽迨陝逆白彥虎糾陝甘悍回
竄至自知勢力不敵安集延思藉爲聲援以自固凡怕
夏所欲不敢違也故怕夏日富而土回日益貧比聞大
軍由巴里坤古城浩蕩而來白逆亦薙髮易服竊附於
安集延其紿死黨與土回堅拒官軍自觀成敗伺間脫
走則又此賊之慣技也此次兵由北路而進一在扼其
紛竄以省防兵一在下兵南路防其牽綴而由關內出

兵踰伊吾車師之地越天山蒲類重險與犬羊相角逐
不自忖兵力餉力之足與不足置成敗利鈍於不顧者
蓋不得烏魯木齊無駐軍之所賊如紛竄無以制之不
僅陝甘之憂卽燕晉內外蒙古將無息肩之日若停兵
巴古以東瘠區兵少無以扼奔衝兵多徒以耗軍餉無
論非時局所堪卽四海宴安軍儲贍裕亦斷難爲持久
之計茲幸

聖模廣運

宸慮獨操樞垣計部諸臣仰體

淵衷詳爲籌措使行間將士得以壹意前驅旬日之間
連下堅城肅伸

天討固非

微臣

始念所及也在事尤爲出力文武各員

著有微勞合無仰懇

天恩先加甄敘以昭激勵

賞穿黃馬褂三品卿銜布政使銜西甯道雲騎尉世職
怯福凌阿巴圖魯劉錦棠忠勇罕儔機神敏速有謀能
斷履險如夷實一時傑出之材其應如何

破格優獎之處出自

天恩

賞穿黃馬褂頭品頂戴記名提督甘肅甯夏鎮總兵
何世祥巴圖魯譚拔萃

賞穿黃馬褂頭品頂戴題奏提督陝西漢中鎮總兵
伯奇巴圖魯譚上連

賞穿黃馬褂頭品頂戴題奏提督陝西陝安鎮總兵
奇車博巴圖魯余虎恩以上三員樸勇沈毅洞曉機宜
此次督隊連克數城勲勤卓著均請

破格恩施

賞穿黃馬褂頭品頂戴記名提督奇朗阿巴圖魯譚和
義

賞穿黃馬褂頭品頂戴記名提督霍隆武巴圖魯席大
成以上二員勇敢過人饒有識畧此次督隊攻城勞績
丕著均請

破格施恩記名提督前署陝西漢中鎮總兵伯奇巴圖
魯黃鵬頭品頂戴記名提督克坦阿巴圖魯肅元亨
以上二員均請

賞穿黃馬褂二品頂戴陝西推補參將戢勇巴圖魯董

福祥請免補參將副將以總兵

交軍機處記名遇有缺出請

旨簡放並請

賞換清字勇號頭品頂戴記名提督葉鏗額巴圖魯陶
生林頭品頂戴記名提督暖什蘭巴圖魯唐國華頭品
頂戴記名提督阿克丹巴圖魯湯秀齋以上三員均請
以提督留於陝甘遇缺儘先題奏並請

交部照頭等軍功從優議敘頭品頂戴記名提督剛安
巴圖魯陳廣發請

交部照頭等軍功從優議敘記名提督額爾克巴圖魯
戴宏勝記名提督都隆額巴圖魯譚慎典遇缺題奏提
督哲爾精阿巴圖魯張春發以上三員均請

賞給頭品頂戴並請

賞給正一品封典總兵銜升用副將留陝補用參將倭
欣巴圖魯張俊請免補參將副將以總兵

交軍機處記名遇有缺出

旨簡放並請

賞給正二品封典記名總兵胡敦巴圖魯陶鼎金請以

提督

交軍機處記名遇有提督總兵缺出請

旨簡放並請

賞給正一品封典總兵銜湖北補用副將威勇巴圖魯

湯仁和請免補副將以提督

交軍機處記名遇有總兵缺出請

旨簡放並請

賞給正一品封典

賞穿黃馬褂頭品頂戴記名提督果勒明阿巴圖魯羅

照陞記名提督鵠勇巴圖魯賀長發以上二員均請
賞給正一品封典二品頂戴留陝補用參將霍仰春巴
圖魯季雙良請免補參將以副將仍留原省儘先補用
並請

賞加總兵銜藍翎拔補千總崔偉畢大才禹中海以上
上三弁均請免補千總守備以都司留於甘肅儘先補
用並請

賞換花翎花翎守備禹益長馬正國以上二員請免補
守備以都司留於甘肅儘先補用頭品頂戴記名提督

蘇彰阿巴圖魯李隆寶頭品頂戴記名提督努克齊斯
思理巴圖魯李有成頭品頂戴記名提督額爾德蒙巴
圖魯趙寶杯頭品頂戴記名提督匡義志頭品頂戴記
名提督多托哩巴圖魯潘長青記名提督伊白德巴圖
魯彭明達記名提督琿武巴圖魯彭楨祥記名提督奇
車伯巴圖魯張輔文以上八員均請

交部照頭等軍功從優議敘記名提督西吉爾琿巴圖
魯李清勝記名提督烏勒興額巴圖魯彭連陞記名提
督效勇巴圖魯劉廣昌記名提督張錦文提督銜記名

總兵李克常補用提督陳義和記名提督霍欽巴圖魯
蕭萬和記名提督勝勇巴圖魯張玉輝記名提督法什
尚阿巴圖魯劉象賢記名提督壯勇巴圖魯周玉卿以
上十員均請

賞給頭品頂戴周玉卿並請

賞換清字勇號頭品頂戴記名提督訥恩登額巴圖魯
陳建厚請

賞給正一品封典提督銜補用總兵伯奇額巴圖魯潘
鳳翔提督銜記名總兵奇勇巴圖魯劉元元遇缺簡放

總兵李超羣補用總兵范守雲張仕林補用總兵強勇
巴圖魯方南英總兵銜補用副將嚴勇巴圖魯蘇有慶
留甘補用副將易喜正提督銜補用總兵西林巴圖魯
李泗益補用總兵奮勇巴圖魯唐宗堯記名總兵宋有
貴補用總兵哈豐阿巴圖魯孫仕尚記名總兵楊文彪
補缺後陝西總兵陝西補用副將強勇巴圖魯楊金龍
留陝補用總兵綽勒果羅勒額巴圖魯丁連科以上十
五員均請以提督

交軍機處記名遇有提督總兵缺出請

旨簡放李超羣楊文彪方南英唐宗堯蘇有慶並請

賞換清字勇號范守雲張仕林李泗益並請

賞給正一品封典總兵銜安徽補用副將梁冠葵請免
補副將以提督

交軍機處記名提督總兵缺出請

旨簡放補用總兵彭勇巴圖魯鄧政升請

賞加提督銜並請

賞換清字勇號提督銜補用總兵易榮昌請以提督

交軍機處記名請

旨簡放記名提督執勇巴圖魯葛致清記名提督翌勇
巴圖魯劉國斌補用提督進勇巴圖魯王義和記名提
督勝勇巴圖魯楊泰球總兵銜補用副將秀勇巴圖魯
蘇貴興記名總兵彥勇巴圖魯曾楚南總兵銜補用副
將承勇巴圖魯龍春華補用副將承勇巴圖魯沈祥發
補用副將銳勇巴圖魯楊玉恒以上九員均請

賞換清字勇號楊泰球並請

賞給正一品封典楊玉恒並請

賞加總兵銜補用總兵曹復勝記名總兵傅長春總兵

銜留甘補用副將李桂堂總兵銜補用副將余聖壽以
上四員均請

賞給清字勇號補用總兵楊春發補用副將田登雲副
將銜補用參將唐華光沈寶堂補用參將鍾瓊林參將
銜補用遊擊廖紅贊王建林副將銜補用參將董天海
補用都司姚建仁董占富以上十員均請

賞給勇號副將銜補用參將劉福田請免補副將參將
以總兵交軍機處記名運有總兵缺出請
旨簡放並請

賞給勇號總兵銜推補副將機勇巴圖魯朱凌雲補用
副將周世福王秀偉許得勝蔣太和朱星貴副將銜補
用參將忠勇巴圖魯岳朝珍補用副將桓勇巴圖魯胡克
華副將銜補用參將汪友德謝復勝補用副將壯勇巴
圖魯劉長其總兵銜補用副將王太山陳國明張佳志
以上十四員均請免補副將以總兵

交軍機處記名遇有總兵缺出請

旨簡放朱凌雲岳朝珍胡克華朱星貴汪友德王太山
並請

賞加提督銜周世福並請

賞給清字勇號王秀偉謝復勝陳國明並請

賞給勇號副將銜補用參將楊先勝田仲魁王俊邦補
用參將熊瑞堂彭勝金藍翎儘先補用參將伍得榮補
用參將雄勇巴圖魯胡登花補用參將尚勇巴圖魯張
果以上八員均請免補參將以副將儘先補用並請
賞加總兵銜伍得榮並請

賞換花翎彭勝金田中魁並請

賞給勇號兩江補用參將胡少廷請

賞加副將銜並請

賞給勇號兩江補用參將毅勇巴圖魯陳鵬翥副將銜
留陝補用參將便勇巴圖魯趙輝南補用參將彭秀文
留甘補用參將黃得雲石蘊玉以上五員均請免補參
將以副將仍留各原省儘先補用陳鵬翥趙輝南並請
賞換清字勇號陳鵬翥趙輝南彭秀文黃得雲石蘊玉
均請

賞加總兵銜石蘊玉並請

賞給清字勇號補用副將徐文麟請以本班留於江西

儘先補用並請

賞給勇號補用遊擊張復良請免補遊擊參將以副將儘先補用並請

賞給勇號留陝甘補用遊擊曾照德請免補遊擊參將以副將仍留原省儘先推補補用遊擊李明清請免補遊擊參將以副將儘先補用並請

賞給勇號補用參將鄭得茂王廷俊副將銜補用參將張友圭以上三員均請免補參將以副將留於甘肅儘先補用並請

賞給勇號補用遊擊馮金山蕭長青李能傑王中才彭
常茂劉道忠張金發王金勝汪大吉萬本華彭得清劉
高漢方成德查春華遊擊銜補用都司趙自新楊其祥
以上十六員均請免補遊擊以參將儘先補用馮金山
李能傑王中才彭常茂劉道忠趙自新並請

賞給勇號蕭長青張金發王金勝汪大吉萬本華彭得
清劉高漢方成德查春華並請

賞加副將銜補用遊擊譚正南留陝補用遊擊杜錫斌
以上二員均請免補遊擊以參將儘先補用譚正南並

請

賞加副將銜杜錫斌並請

賞給勇號花翎補用都司吳首懷請免補都司遊擊以

參將儘先補用並請

賞加副將銜補用遊擊楊厚德請免補遊擊以參將儘

先補用並請

賞加副將銜補用都司宋祖喜李永昭二員均請免補

都司遊擊以參將儘先補用留陝補用遊擊胡得貴請

留於甘肅儘先補用並請

賞加副將銜補用遊擊胡柱庭請免補遊擊以參將儘
先補用並請

賞加副將銜補用遊擊田九福請免補遊擊以參將留
於陝西儘先補用並請

賞加副將銜花翎補用都司賀雲陶藍翎補用都司張
立德都司銜補用守備江三元許獻德張花趙輔清張
管英等七員均請免補都司以遊擊儘先補用賀雲陶
並請

賞給勇號張立德並請

賈換花翎江三元許獻德張花並請

賈加參將銜安徽補用遊擊羅成魁

賈加參將銜補用都司譚法青請免補都司以遊擊儘
先補用並請

賈給勇號藍翎補用守備張大林請免補守備都司以
遊擊儘先補用並請

賈換花翎花翎守備楊榮貴請免補都司守備以遊擊
儘先補用藍翎補用都司周福貴請免補都司以遊擊
留於甘肅儘先補用並請

賞換花翎補用守備陳得時趙奉樂監翎補用守備史
得萼以上三員均請免補都司守備以遊擊儘先補用
史得萼並請

賞換花翎補用守備劉萬明請免補都司守備以遊擊
留於陝西儘先補用藍翎補用守備馬正揚蕭益星鄒
占春補用守備王保山藍翎守備銜拔補千總魏其德
胡德成都司銜補用守備李有倉黃貴倪元宵守備銜
拔補千總苗生有以上十弁均請免補守備以都司儘
先補用馬正揚蕭益星鄒占春王保山李有倉黃貴倪

元宵並請

賞加遊擊銜馬正揚蕭益星魏其德胡得成並請

賞換花翎鄒古春並請

賞給勇號補用守備趙楚南藍翎補用守備黎貴發以
上二員均請免補守備以都司留於陝甘儘先補用並
請

賞加遊擊銜藍翎補用守備雷開明請免補守備以都
司儘先補用並請

賞加遊擊銜參將仍留原省儘先補用並請

賞換花翎藍翎拔補千總莊偉藍翎守備銜拔補千總
連福以上二弁均請免補千總守備以都司儘先補用
並請

賞換花翎花翎五品頂戴補用衛千總左執簪請免補
千總守備以都司儘先補用並請

賞加遊擊銜藍翎補用千總譚用賓湯殿恒以上二弁
均請免補千總守備以都司儘先補用並請

賞換花翎藍翎拔補千總高必達黎積善左長清以上
三弁均請免補千總以守備儘先補用並請

賞加都司銜

賞換花翎藍翎拔補把總賈永清李先藻喻文定湯如發藍翎拔補把總崔金魁米萬榮黑馬貴哈萬虎郭定祥李金良禹寶山黑明昌禹彥發符永先以上十四弁均請免補千總把總以守備儘先補用並請

賞換花翎喻文定並請

賞加都司銜軍功胡德馬源均請免補外委把總以千總儘先拔補並請

賞戴藍翎六品軍功馬榮請免補外委以把總儘先拔

補並請

賞戴藍翎花翎留陝補用知府羅長祐請免補本班以
道員仍留原省遇缺儘先題奏並請

賞加按察使銜花翎陝西候補知府黃光遠請免補本
班以道員仍留原省儘先補用花翎知府用浙江候補
同知直隸州知州袁世齡請免補本班以知府仍留原
省歸軍功候補班前補用並請

賞加鹽運使銜遇缺選用知縣胡焜請免選本班以知
州分發省分歸候補班前補用並請

賞戴花翎舉人揀選知縣關隴肅清各項差使案內彙
保分省補用知縣蔡掄科請免補知縣以知州分省歸
候補班前補用並請

賞戴花翎知縣用分省補用府經歷虞志雲分省補用
縣丞左承伯以上二員均請免補本班以知縣仍分發
省分歸候補班前補用並請

賞加同知銜

賞戴花翎藍翎分省補用縣丞劉式南劉昭南以上二
員均請免補本班以知縣仍分發自分歸候補班前補

用並請

賞加同知銜

賞換花翎花翎鹽提舉銜儘先卽選知縣段兆熊請免
選本班以同知直隸州知州分發省分歸軍功候補班
前補用分省補用縣丞吳忠炳曾廣壇以上二員均請
免補本班以知縣仍分發省分歸候補班前補用並請
員戴藍翎六品銜分省補用從九品高樟請免補本班
以縣丞仍分發省分歸候補班前補用並請

賞戴藍翎卽選從九品周宗恒請免選本班以縣丞留

於甘肅歸候補班前補用並請

賞戴藍翎鹽運使銜陝西候補道王詩白請

賞加二品頂戴並請

賞給三代正二品封典陝西候補知府周漢請免補本班以道員仍留原省儘先補用此外出力員弁勇丁容卽核明彙案保奏陣亡記名提督松勇巴圖魯楊萬義記名總兵王春和總兵銜兩湖補用副將徐桂林儘先補用副將朱炳森蒯發祥沈有金彭文斌參將銜補用游擊彭懷壽補用游擊邱長明都司周金龍周俊德劉

授亨王蘭惠謝麒麟曾添龍守備喬松山蕭連殷長
發戴榮華劉高升林宗貴許占雲徐得雲蔡永福黃清
卒陳明高李養元蕭華富陳紫林王得意曹東漢蘇春
華陳東林把總郭王堂王春和張致祥周友玉王玉貴
譚長易蔣松泉趙義勝馬吉祥彭廣仁外委庶天元六
品軍功湯雲龍楊海堂林昌炳宋玉發陳志勝祈班成
侯牛九宋元登姚家玉陳勝發鄧家全賀永壽蕭永明
龍丕承姚金榮羅永發以上六十員名均係攻堅奪隘
血戰捐軀深堪憫惻應請

旨飭部各照官階從優議卹餘俟查明彙奏至金順一
軍戰狀詳細除由金順自行馳

奏外謹將劉錦棠會師進剿攻拔古牧地城堅巢克復
烏魯木齊廸化州各城池戰狀詳細情形會同幫辦軍
務臣金順合詞具陳伏乞

皇太后

皇上聖鑒訓示謹

奏
光緒二年八月初一日

李雲麟懇 恩開復片

再已革副都統銜前布倫托海辦事大臣李雲麟於同治十二年間經臣以該革員剛明耐苦性不好利奏調赴臣營差委奉

旨允准該革員旋因親老聲請本旗奏准終養隨丁父憂光緒元年服闋復經呈請本旗奏赴軍營差委奉旨依議該革員領憑由京起程本年二月抵臣軍營時值總理行營營務道員劉錦棠率師出塞臣令李雲麟偵察賊情諷稽地利一切資其贊畫現在新疆北路肅

清規復南路不但軍務需才以後經理地方亦正需指
臂之助李雲麟質地實堪造就早經陳明合無仰懇
天恩准將李雲麟開復副都統銜並

賞還翎枝由臣加意磨礪消其躁志矜情歸於穩實隨
時差委冀可成一人材於西事不無裨益謹附片具陳
伏乞

聖鑒訓示謹

奏光緒二年八月初二日

請飭部查催協餉摺

奏爲各省協餉延欠未解請

旨飭下部臣核明已解未解成數分別行催以資軍食而利戎機仰祈

聖鑒事竊臣軍出關餉需必奉

諭旨准發部款二百萬兩各省提前解三百萬兩借洋款五百萬兩各省協款毋得以八成自限如不能解至八成以上部臣從嚴參辦臣奉

旨後通盤籌畫竊計本年的餉部款與提前協款外尚

有各省應解八成以上實銀足資周轉洋款自宜從緩
商借已於四月十三日

奏明在案所以緩借洋款者原以各省八成以上協款
必可恃也溯自奉

旨日起截至六月底止據西征糧台陸續報收部款二
百萬兩各省提前協餉二百四十餘萬兩其非提前之
協餉亦四十餘萬兩共約收銀四百八九十萬兩該糧
台於收到後歸還上年息借商銀及留支應發各款餘
解蘭州辦理陝甘軍務臣劉典於收到後除發開內各

營隨菜火食糧運經費暨緊要各款外儘解臣營隨撥
給前敵各營餉需俄人糧價哈密巴里坤古城等處採
運各費以上計共發銀三百數十萬兩計合各處收發
抵算存銀僅止一百數十萬兩刻下烏垣各城以次克
復遠征士卒轉戰勞苦則餉需不可缺也新糧登場急
宜收購則採買不可緩也白露已過駱駝起廠則轉運
不可歇也各城新克百廢待興亟須設官駐營舉行賑
濟屯墾諸政賊蹤既聚南路又將移巴里坤古城哈密
之師兼調馬步各營會剿亟須辦理軍火糧運局勢愈

開需用愈多通盤籌畫儘目前存項計之計九月十月以後餉事又當斷絕伏念夏間

奏請緩借洋款所恃者各省協餉解至八成以上尚期周轉近查各省協餉惟福建一省解數尚有長餘浙江江西湖南山東次之餘皆未能如數起解其欠數最多者莫如廣東江蘇兩省廣東除舊欠二百四十餘萬兩不計本年提前之五十萬兩現未解及十分之一江蘇除舊欠一百七十餘萬兩不計本年應協之六十五萬兩現未解及十分之二且於協款以外常年應解老湘

軍餉每月四萬五千兩一款今年連閏八箇月並未起解臣雖以西征餉代爲挪墊卅餘萬兩暫顧急需而兩廣頻催該督臣撫臣未覆也臣維西征軍士久荷恩卹至優且渥部臣亦仰體

聖懷深知邊防爲重綜核甚嚴在各省餉數有無虧欠何嘗不了然於心西事艱難何嘗不了然於口臣何敢復贅一詞徒取憎厭部議統俟年終核計自應靜以俟之第師行絕域而且愈遠距協餉各省均在數千里萬里以外卽令各省如期起解臣隨收隨發尚有緩不濟

急之虞若各省遲速難期臣更何從措手現在局勢尚
順正盼餉事應手迅赴戎機如待年終核辦卽令嚴參
催解而已坐失事機未免可惜且枵腹遠征萬一利鈍
靡常則大局尤不堪設想也合無仰懇

天恩飭下部臣查明各省協餉已解未解成數分別嚴
催庶邊防攸賴士氣常新微臣得所藉手斷不敢老師

糜餉自外

生成感荷

皇仁曷有既極所有臣軍需餉緊急請

飭部臣查核嚴催各緣由理合恭摺陳明伏祈

皇太后

皇上聖鑒訓示施行謹

奏光緒二年八月初一日

光緒二年八月十六日內閣奉

上諭前據左宗棠奏攻拔古牧地堅巢克復烏魯木齊
迪化州各城大概情形業經降旨宣示茲復據該督將
詳細情形馳奏與金順前奏大畧相同道員劉錦棠會
同金順督兵進攻古牧地連戰大捷逼擊盡擊立拔堅

城首要各逆擒斬淨盡並將安集延援賊一律殲除乘
勝進兵賊眾奔竄追殺數十里斬餘多名連克烏魯木
齊迪化州等城剿辦極爲得手所有尤爲出力之西甯
道劉錦棠著賞給騎都尉世職提督譚拔萃譚上連余
虎恩譚和義席大成均著賞給雲騎尉世職黃萬鵬蕭
元亨均著賞穿黃馬褂參將董福祥著免補參將副將
以總兵交軍機處記名遇有缺出請旨簡放並賞換阿
爾杭阿巴圖魯名號提督陶生林等均著以提督留於
陝甘遇缺儘先題奏並交部照頭等軍功從優議敘陳

廣發著交部照頭等軍功從優議敘戴宏勝等均著賞
給頭品頂戴並賞給正一品封典參將張俊著免補參
將副將以總兵交軍機處記名遇有缺出請旨簡放並
賞給正二品封典總兵陶鼎金著以提督交軍機處記
名遇有提督總兵缺出請旨簡放並賞給正一品封典
副將湯仁和著免補副將以提督交軍機處記名遇有
提督總兵缺出請旨簡放並賞給正一品封典提督羅
照陞等均著賞給正一品封典參將李雙良著免補參
將以副將仍留陝西儘先補用並賞加總兵銜千總崔

偉等均著免補千總守備以都司留於甘肅儘先補用
並賞換花翎守備禹益長等均著免補守備以都司留
於甘肅儘先補用提督李隆國等均著交部照頭等軍
功從優議敘李清勝等均著賞給頭品頂戴內周玉卿
並賞換喀爾莽阿巴圖魯名號陳建厚著賞給正一品
封典總兵汪鳳翔等均著以提督交軍機處記名遇有
提督總兵缺出請旨簡放內李超羣並賞給愛興阿巴
圖魯名號楊文彪並賞給霍隆額巴圖魯名號方南英
並賞換蘇章阿巴圖魯名號唐宗堯並賞換額騰額巴

圖魯名號蘇有慶並賞換博卿額巴圖魯名號范守雲
等三員並賞給正一品封典副將梁冠葵著免補副將
以提督交軍機處記名遇有提督總兵缺出請旨簡放
總兵鄧政升著賞加提督銜並賞換西吉爾琿巴圖魯
名號易榮昌著以提督交軍機處記名請旨簡放提督
葛致清著賞換首德本巴圖魯名號劉國斌著賞換噶
爾薩巴圖魯名號王義和著賞換阿克丹巴圖魯名號
楊泰球著賞換伊勒通額巴圖魯名號並賞給正一品
封典副將蘇貴興著賞換額騰依巴圖魯名號總兵會

楚南著賞換年常阿巴圖魯名號副將龍春華著賞換
霍伽春巴圖魯名號沈祥發著賞換圖勒炳阿巴圖魯
名號楊玉恒賞換穆特恩巴圖魯名號並賞加總兵銜
曹復勝著賞給尼鏗額巴圖魯名號傅長春著賞給格
洪額巴圖魯名號副將李林堂著賞給訥恩登額巴圖
魯名號余際壽著賞給喀勒春巴圖魯名號總兵李春
發著賞給直勇巴圖魯名號副將田登雲著賞給志勇
巴圖魯名號參將唐華光著賞給克勇巴圖魯名號沈
寶堂著賞給資勇巴圖魯名號鍾璣林著賞給桓勇巴

圖魯名號遊擊廖廷贊著賞給固勇巴圖魯名號王建
林著賞給銳勇巴圖魯名號參將董天海著賞給果勇
巴圖魯名號都司姚建仁著賞給綽勇巴圖魯名號董
占富著賞給尚勇巴圖魯名號參將劉福田著免補參
將副將以總兵交軍機處記名遇有總兵缺出請旨簡
放並賞給奮勇巴圖魯名號副將朱凌雲等均著免補
副將以總兵交軍機處記名遇有總兵缺出請旨簡放
朱凌雲等六員並賞加提督銜周世福並賞給法克精
阿巴圖魯名號王秀偉並賞給捷勇巴圖魯名號謝復

勝並賞給確勇巴圖魯名號陳國明並賞給勁勇巴圖魯名號參將楊先勝等均著免補參將以副將儘先補用並賞加總兵銜伍得榮並賞換花翎彭勝全並賞給敢勇巴圖魯名號田仲魁並賞給強勇巴圖魯名號參將胡少廷著賞加副將銜並賞給效勇巴圖魯名號陳鵬翥等均著免補參將以副將仍留各原省儘先補用陳鵬翥並賞換倭欣巴圖魯名號趙輝南並賞換喀勒冲依巴圖魯名號陳鵬翥等五員並賞加總兵銜石蘊王並賞給琿武巴圖魯名號副將徐文麟著以本班留

於江西儘先補用並賞給堅勇巴圖魯名號遊擊張復
良著免補遊擊參將以副將儘先補用並賞給健勇巴
圖魯名號曾照德著免補遊擊參將以副將仍留陝甘
儘先推補李明清著免補遊擊參將以副將儘先補用
並賞給勝勇巴圖魯名號參將鄭得茂等均著免補參
將以副將留於甘肅儘先補用鄭得茂並賞給策勇巴
圖魯名號王廷俊並賞給靖勇巴圖魯名號張友雲並
賞給鼓勇巴圖魯名號遊擊馮金山等均著免補遊擊
以參將儘先補用馮金山並賞給猛勇巴圖魯名號李

能傑並賞給碩勇巴圖魯名號王中才並賞給偉勇巴圖魯名號彭常茂並賞給濟勇巴圖魯名號劉道忠並賞給侃勇巴圖魯名號趙自新並賞給勃勇巴圖魯名號蕭長青等九員並賞加副將銜譚正南等均著免補遊擊以參將儘先補用並賞加副將銜杜錫斌並賞給著勇巴圖魯名號都司吳首懷著免補都司遊擊以參將儘先補用並賞加副將銜遊擊楊厚德著免補遊擊以參將儘先補用並賞加副將銜都司宋祖喜等均著免補都司遊擊以參將儘先補用遊擊胡得貴

著免補遊擊以參將仍留陝西儘先補用並賞加副將
銜胡桂廷著免補遊擊以參將儘先補用並賞加副將
銜田九福著免補遊擊以參將留於陝西儘先補用並
賞加副將銜都司賀雲陶等均著免補都司以遊擊儘
先補用賀雲陶並賞給曉勇巴圖魯名號張立德著賞
換花翎江三元等三員並賞加參將銜遊擊羅成魁著
賞加參將銜都司譚法青著免補都司以遊擊儘先補
用並賞給彪勇巴圖魯名號守備張太林楊榮貴均著
免補都司守備以遊擊儘先補用張大林並賞換花翎

周福貴著免補都司以遊擊留於甘肅儘先補用並賞
換花翎守備陳得時等均著免補都司守備以遊擊儘
先補用內史得夢並賞換花翎劉萬明著免補都司守
備以遊擊留於陝西儘先補用馬正揚等均著免補守
備以都司儘先補用馬正揚等七員並賞加遊擊銜馬
正揚等四員並賞換花翎鄒占春並賞給迅勇巴圖魯
名號趙楚南等均著免補守備以都司留於陝甘儘先
補用並賞加遊擊銜雷開明著免補守備以都司留於
陝甘儘先補用並賞加游擊銜賞換花翎千總莊偉等

著免補千總守備以都司儘先補用並賞換花翎左執
黃著免補千總守備以都司儘先補用並賞加遊擊銜
譚用賓等均著免補千總守備以都司儘先補用並賞
換花翎高必達等均著免補千總以守備儘先補用並
賞加都司銜賞換花翎把總賈永清等均著免補千總
把總以守備儘先補用並賞換花翎內喻文定並賞加
都司銜軍功胡德等均著免補外委把總以千總儘先
拔補並賞戴藍翎馬榮著免補外委以把總儘先拔補
並賞戴藍翎知府羅長祐著免補本班以道員仍留陝

西遇缺儘先題奏並賞加按察使銜黃光達著免補本班以道員仍留陝西儘先補用候補同知直隸州知州袁世齡著免補本班以知府仍留浙江歸軍功候補班前補用並賞加鹽運使銜知縣胡焜著免選本班以知州分發省分歸候補班前補用並賞戴花翎蔡掄科著免補知縣以知州分發省分歸候補班前補用並賞戴花翎府經歷虞志雲等均著免補本班以知縣仍分發省分歸候補班前補用並賞加同知銜賞戴花翎縣丞劉式南等均著免補本班以知縣仍分發省分歸候補

班前補周並賞加同知銜賞換花翎知縣段兆熊著免
選本班以同知直隸州知州分發省分歸軍功候補班
前補用縣丞吳忠炳等均著免補本班以知縣仍分發
省分歸候補班前補用並賞戴藍翎從九品高樟著免
補本班以縣丞仍分發省分歸候補班前補用並賞戴
藍翎周宗恒著免選本班以縣丞留於甘肅歸候補班
前補用並賞戴藍翎道員王詩白著賞給二品頂戴並
賞給三代正二品封典知府周漢著免補本班以道員
仍留陝西儘先補用其餘出力員弁兵勇著左宗棠查

明彙案保獎陣亡之提督楊萬義總兵王春和總兵銜
副將徐桂林副將朱炳森崩發祥沈有金彭文英參將
銜遊擊彭懷壽遊擊邱長明都司周金龍周俊德劉接
亭王蘭惠謝麒麟曾添龍守備喬松山蕭有連殷長發
戴榮華劉高升林宗貴許占雲徐得雲蔡永福戴清平
陳明高李養元蕭華富陳紫林王得意曹東漢蘇春華
陳東林把總郭玉堂王春和張致祥周友玉王玉貴譚
長易蔣松泉趙義勝馬祥吉彭廣仁外委麻天元六品
尋功湯雲龍楊海堂林昌炳宋玉發陳志勝祈班成侯

年九宋先登姚家玉陳勝發鄧家全賀永壽蕭永明龍
丕承姚金榮羅永發均著交部各照官階從優議卹餘
著查明彙奏請獎另片奏請將已革辦事大臣懇予恩
施等語已革副都統銜前布倫托海辦事大臣李雲麟
著開復副都統銜並賞還翎枝該部知道欽此

軍機大臣 字寄光緒二年八月十六日奉

上諭左宗棠奏克復烏魯木齊等城詳細情形請將出
力陣亡各員獎卹並請將李雲麟開復各摺片日明降
諭旨賞給劉錦棠世職及文武員弁各照所請分別獎

卹矣烏魯木齊滿漢兩城及古牧地昌吉呼圖壁各城
均已收復一切善後事宜亟應妥爲籌畫左宗棠現在
咨商金順錫綸布置各城堡要隘並咨調張曜徐占彪
會同劉錦棠進規南路添派馬步等隊赴前敵助剿辦
理極爲周妥惟瑪納斯尚未據報攻克金順前奏督軍
進逼想經得手北路是否一律肅清有無餘匪四出紛
竄探報獲賊供稱昌吉呼圖壁瑪納斯等城踞逆先後
向南竄逸究竄何處安集延援賊尚有四五千騎逆首
白彥虎亦在逃未獲是賊匪眾多鋌而走險亟應設法

職除毋任滋蔓金順等布置各城堡要隘及烏魯木齊等處善後事宜卽著與左宗棠隨時會商悉心經理毋稍疏虞張曜等軍既經咨調哈密一帶能否不至空虛張曜是否由南路進剿應如何通盤籌畫以期兼顧著左宗棠審慎以圖勿稍大意一面飭令各軍乘此聲威將南路各城以次攻拔迅奏膚公左宗棠請將李雲麟開復副都統銜賞還翎枝業已降旨照准該員從前辦理軍務不能得力其性情矜躁亦爲該大臣所深知惟旣稱其質地尙堪造就卽著左宗棠隨時裁抑使之言

行相副以成有用之材另摺奏請催各省速解欠餉等語已諭令沈葆楨等迅速籌解矣將此由六百里各諭令知之欽此

軍機大臣 字寄光緒二年七月十八日奉

上諭前因金順奏吉爾洪額等帶隊潛逃當經降旨革職並令沿途截留拏交左宗棠查辦茲據托倫布等奏吉爾洪額依勒和布帶有馬隊二三百名行抵博東齊河地方請旨辦理等語此項官兵既經行抵科布多屬境口糧不繼恐致生事科城現存兵餉諒亦無多著額勒和布車林多爾濟杜嘎爾托倫布保英桂祥分撥銀兩派員前往接濟仍令吉爾洪額等暫行統帶卽在博東齊河地方駐紮妥爲彈壓並著金順卽行派員攜帶

糧餉馳赴科境將此起官兵明白開導帶回古城聽調
一俟官兵接統有人著托倫布保英桂祥仍遵前旨將
吉爾洪額依勒和布拏解左宗棠營由該大臣嚴行查
辦將此由六百里各諭令知之欽此

軍機大臣 字寄光緒二年八月初九日奉

土諭榮全奏剿瑪納斯情形一摺瑪納斯地勢遼闊道路紛歧榮全現派隊伍會合孔才徐學功兩軍協同進攻惟南路一帶爲通吐魯番大路必須重兵防堵以免紛竄之虞榮全以兵力過單孔才徐學功等營亦不過二三千名業經咨行金順添撥步隊會同防剿著左宗棠金順卽派步隊數營前赴該處協同攻剿毋稍疏虞左宗棠務當飭令派出各軍穩慎進取迅將瑪納斯呼圖壁及吐魯番各城以次收復毋令此孽彼竄蔓延爲

患將此山五百里各諭令知之欽此

軍機大臣 字寄光緒二年八月十二日奉

上諭金順奏攻克輯懷烏魯木齊昌吉等城詳細情形
乘勝克復呼圖壁景化城各一摺已明降諭旨宣示出
力陣亡各員并均照請分別獎卹矣西路各城業經次
第攻克事機頗爲順手亟應乘此聲勢先將瑪納斯城
攻拔以次廓清南路戡定西陲金順現已親率各隊督
剿瑪納斯賊匪卽著激勵將士將該城合力圍攻務使
覘類聚殲毋任逃竄其各城敗殘餘匪究竟竄向何處
且白彥虎現尚稽誅豈可任其漏網著左宗棠金順飭

令各營偵探賊蹤實力攻剿迅將首逆並其餘黨與一
鼓殲除毋令四出紛竄滋蔓難圖新復各城守事宜並
著左宗棠金順妥爲布置將此由六百里各諭令知之
欽此

軍機大臣 字寄光緒二年八月十四日奉

上諭吉爾洪額奏追撫潰兵伏罪請旨各摺片吉爾洪額不遵金順調度率領兵隊擅自北行茲據所奏各情顯係飾詞瀆辯前已有旨將該員革職押解進關交左宗棠查辦所部官兵並諭令金順派員馳赴科境接統著保英等傳旨諭知該革員此次任意抗違獲咎已重俟金順派員前來即將所帶各隊妥爲交卸毋得稍事遷延益加罪戾至此項官兵口糧著額勒和布車林多爾濟杜嘎爾保英桂祥遵奉前旨籌撥接濟金順迅卽

揀派委員攜帶餉糧前往接帶將該官兵明白開導善
爲拊循毋任再滋事端保英等俟官兵接統有人卽將
吉爾洪額等拏解左宗棠軍營由該大臣嚴行查辦將
此由六百里各諭令知之欽此